



Takornariat umiarsuarnik takornariartaatinik tikittut tulannerminni isumannaallisaa-nikkut akitsuuserneqarnissaannik Naalakkersuisut UKA2024-mi Inatsisartunut saqqumiussassamik inatsisiliornissaat pillugu Inatsisartut aalajangiiffisassaattut siunnersuut. Isumannaallisaa-nikkut akitsuutip siunertaraa inupparujussuit umiarsuarujussuarlutik tikittut tulannerminni timmisartukkut tikittutuut periuseq malillugu nalunaarsorneqartalernissaat, nunatsinnilu aningaasaqarnikkut iluanaarutigineqarsinnaalerlutik.

(Inatsisartunut ilaasortaq Aqqalu C. Jerimiassen, Atassut)

Siullermeernera:

Siunnersuuteqartoq Aqqalu C Jerimiassen siunnersuutinnu qujanaq.

Umiarsuarnik takornariartaatini takornarissat tikittut tulannerminni isumannaallisaa-nikkut akitsuuserneqartalernissaat isumaqataaffigaarput Naleqqamiit, nunatsinnimi takornariartaatit umiarsuit amerliartupiloorput ukiuni kingullerni, nunarput takujuminartuullunilu avatangiiserput toqqissimasoq inuppassuarni soqutigineqarnera alliaruinnarpoq.

Naleqqamiit siunnersuuteqartoq taparserparput, takornariaqarneq ineriartortuarpoq nunarsuatsinni aammalu pingaaruteqarluninnoq umiarsuit nunatsinni tulattut akitsuuserneqarnissaa pissusis-samisoortutut isigaarput.

Minnerunngitsumik taanngitsoorusunngilarput nunatsinnut umiarsuit, tissiartaatsit allallu nunatsinni isertut tamaasa malinnaavigineqalernissaat, piniartoqarfissuaqarpugut sinerik tamaat kangerlup-passuaqarlutalu, kangerluillu amerlasuut piniartut inuuniarnerminni piniarfigilluartarpaat umi-arsuillu killilersimaaneqarnissaat akuersissumillu peqartarnissaat kissaatiginarpoq, piniartummi inuuniarnerminni piniarfigisaat umiarsuarnik allanilli pulaneqaraangata piniagassarpassuarnik tammakartitsisarput.

Piniartormi allamik inuussutissarsiuteqarani piniakkaminik inuususoq pingaaruteqarpoq piniak-kaminik akornusersunneqannginnissaa.

Umiarsuit, tissiartaatit allallu kangerlunnik pulasut malinnaavigilerneqarnissaat pingaarluinnar-tuuvoq, ilimagilluinnarparulu Naalakkersuisut tamanna ilisimanngikkaat umiarsuit, tissiartaatit allallu kangerlutsinni pularsartut susarsimassanersut, pissuustigut uumaatsut uumassusillillu akeqanngitsumik annissuisoqarsimappat assut uagutsinnut akisussaaq, taamaappat nunatsinnut isertut tamaasa malinnaavigeqqissaalerneqarnissaat kissaatiginarpoq.



Naleraq

Taama naatsumik oqaaseqarlunga siunnersuut ataatsimiititaliamut susasaqartumut ingerlateqqipparput.